

SURMEIR: teir campester 2021

Sa partecipe agl teir campester!

Gion Nutegn Stgier/FMR

Perveia dallas maseiras digl coronavirus è chel teir tradiziunal nia spusto gl'onn passo e chegl ainten l'antiera Svizra. Dalla vart dall'Associaziun svizra da teir (SSV) è nia decida tgi mintga federaziun da teir cantunala possa manar tras igl teir campester 2020 anfignen alla fegn da settember. Aint igl Grischun è chel gia li igls 19 da fanadour, damai set emdas pi tard tgi usito alla fegn da matg. Ossa chest onn è chel teir da tradiziun er li puspe aint igl Grischun e chegl igl madem taimp scu igls oters onns, la davosa fegn d'emda da matg. Tratg igl teir campester vign er an Surmeir. Scu adegna vign igl teir cun ena tradiziun da 150 onns tratg an Val Alvra ed er an Surses. La participaziun agl teir campester è gratuita. Per sagettar igls 18 colps cun l'arma da militer e la pistola da militer ins paia navot. Impurtant è betg igl resultat, persiva la participaziun agl teir campester. Urs Brazerol da Farrera è gia gudagnea igl teir campester an Surmeir avant en onn, cun far 70 da 72 puncts

pussebls sen la distanza da 300 meters. Sen la distanza da 25 meters è Baldin Buschauer da Filisour gia procuru cun la sia victorgia per ena sorpresa. Igl gioven tiradour è gia tratg 75 puncts da 180 puncts pussebls.

Teir campester: taimps da teir

Crappa Naira, 300 meters

Sonda, igls 29 da matg 2021

18.00 - 20.00

Dumengia, igls 30 da matg 2021

09.00 - 11.30

Rona, 300 meters

Sonda, igls 29 da matg 2021

18.00 - 20.00

Dumengia, igls 30 da matg 2021

09.00 - 11.30

Rona, 25 meters

Sonda, igls 29 da matg 2021

10.00 - 18.00



A Crappa Naira ed a Rona on Surmirans e Surmiranas la pussebladad da trer igl teir campester.

Foto Gion Nutegn Stgier

BRINZAULS

Cantun garantescha project per dislocar

(cdm/fmr) La regenza garantescha alla vischnanca d'Albula/Alvra ena contribuziun cantunala da maximal 459'000 francs pigl project preliminar per planisar la dislocaziun da Brinzauls. Chegl è communitgia la regenza grischuna gievgia anvers las medias. A Brinzauls, ena fracziun dalla vischnanca d'Alvra, è an muvimaint ena bova d'ena gron-

da extensiu. Durant igls davos 4 onns è chella s'accelerada fermamaintg. Actualmuintg importa la sveltezza dalla bova giun vischnanca var 1,2 meters per onn. La part vest dalla bova sa mova actualmuintg schizont cun 1,6 meters per onn. Vetiers vign igl muvimaint dalla bova Muntogna tg'è s'augmentada mademamaintg fitg ferm igls onns

passos (anfignen 7 meters per onn). Antras chegl è la fracziun Brinzauls scu er igls conturns pi vasts periclitos da grondas crudadas da crappa.

Actualmuintg vign construeida ena galareia da sondar tgi duess furneir infurmaziuns impurtantas davart las relaziuns digl crepel e dalla bova. Pi tard duess la galareia neir estendeida ad ena galareia da drenascha.

Causa da chella situaziun precara sa prepara la vischnanca er pigl scenari tgi la fracziun Brinzauls na fiss betg ple abitabla. Perchegl è la vischnanca incumbenzo igl mars 2020 – ena indemnizaziun cugl cantun – l'interpresa Stauffer e Studach da Coira cun l'evaluaziun d'en studi da planisaziun pigl scenari d'ena dislocaziun. Sa basond sen chel studi è nia elaboro igl project preliminar per planisar ena dislocaziun.

Gio igls 7 da matg è la radunanza communal digl cumegn d'Albula/Alvra delibero en credit da 510'000 per chel preproject. Ossa è damai garanteida er la participaziun da vart digl cantun, an l'otezza da 90% digl import total.



La regenza sustigna igl cumegn d'Albula/Alvra cun prest en mez milliun francs.

Foto Cantun Grischun